

Ti xroon saoxín tsíkjin

Pedro

Xrankíxixín nixja Pedro

1 ¹Janhan Pedro, mé kjueyá Jesucristo kixin sít'aha ch'an ixra, mé ikjian ti xroon i, chr'ahánra jahara sátsíkjira ókjé chjasin, tjejora Ponto, Galacia, Capadocia, Asia la ko Bitinia. ²It'éni Díos tsíkjeyá ti jahara ndesi ósé, ts'ónara chjasén ch'an kixin xíkaha tsíkjenkayáxin ch'an. Kjuachaxién Nchakuén Díos kuitekáonra ch'an la ko kótjuáxinra ti ijní Jesucristo.

Díos sincheñao ti jahara kixin kjuaxróxin ts'ejora.

Ti nkehe tjejóchóheni

³Chrokjuikosáyeheni Díos, It'é Ìnchéni Jesucristo, kixin kuikonoéhe ch'an ti jeheni kixin ts'ónani chojni nixin kixin xechón Ìnchéni. Mé xíkaha tjejóchóheni kixin tsokjan ch'an, ⁴la ko ts'áyeheni ti nkehe jína tsjajon Díos, chóna ch'an nkaya nkajní, mé tíha la ijnko nkehe xitjahya ts'itjáña, xitjahya tsokjita la ko xitjahya tsoxamá. ⁵Jahara tinkachónkira Díos, méxra jehe ch'an t'ayakuenxín

ch'an ti jahara ti kjuachaxin kuénté ch'an, kixin ndá jína tsaára, éxi tsíkjenkayáxin Díos tsohen ti ñao tsjixixín.

⁶Méxra imá chrókócháhara, kjónté ichrén nkehe náxrjónhña chrók'uatsínkara ijie. ⁷Ti tinkachónkira Ìnchéni la éxi ti oro ticháxin ts'atsínkaxín xrohi kixin tsoxoxín á chaxín oro jína. Kjánchó antsí sínkí ti tinkachónkira Ìnchéni ke ti oro, Méxra ticháxin ts'atsínkaxínra ichrén nkehe náxrjónhña kixin tsondáchro Díos kixin jína kjuachara, ndá ts'ayéhéra kjuachaxin la ko kjuasáya ti ñao itsi Ìnchéni Jesucristo.

⁸Jahara tjuéhéra Ìnchéni Jesucristo kjónté naxa k'uíkonhñara ch'an. Ijie la tinkachónkira ch'an kjónté t'íkonhñara ch'an, la xíkaha chontara ijnko kjuachéhe imá ijíé, la kohya nkehe sincheyóexini kixin antsí náxrjón tíha. ⁹Méxra cháhara kixin k'uitjára nkexrín tsaáxinra, mé xíkaha tinkachónkira ch'an.

¹⁰Ti sin profeta k'uejé ósé la tjinkaon sin antsí chrókónohe

sin kuènté ti kjuachón í, la k'uéchronka sin nkexrín ti kjuachaxin kjuajon Díos chrók'uáyéhe sin kixin imá tjeuhe ch'an ti jehe sin. ¹¹Ti naxa kuihya Cristo, la Nchakuén ch'an kjuínchenohe ti sin k'uéchronka itén Díos ósé kixin tsjasóte ch'an, ndá chr'éxin ts'áyéhe ch'an ti kjuachaxin ijié. Andá ti sin k'uéchronka tíhi mé tjinkaon sin chrókónohe sin nkexro tíha la ko nkesá chrókóhen kaín tíhi éxi chronka ti Nchakuén Díos. ¹²Kjánchó Díos kjuínchenohe ti jehe sin kixin ti nkehe chrónka sin, la jehya tsoxiteyá ti ñao k'uejó sin. Náhí. Hasta ijie mé xiteyá tíha. Ti nkehe chrónka sin la mé ti itan tsaáxini chrónkaxín ti sin kjuakohara, kixin ti kjuachaxin kuènté Nchakuén Díos kuixín nkajní kjuínkítsa ti jehe sin. Kjaxin ti sin ángel tjinkaon sin chrók'uikon sin tíha.

**Díos k'uéyehé ti jeheni
kixin tjóá chrók'uejóni**

¹³Méxra chrókjuénkayáxinra jína chrókjuich'era ixra la ko chrók'uejora nkojína. Kaín asánra chrók'uejochohénra ti kjuachón sintakitonhanra Díos ti ó tsokjan Ìnchéni Jesucristo. ¹⁴Éxi ti ixjan titekaon, mé xikaha chrókuitekáonra Díos. Chrokjuénkayáxinhñara ti nkehe nduáhya éxi k'uékjenkayáxinra ósé ti naxa k'uéchonhñara Díos.

¹⁵Ícha jína, tjóá chrók'uejora kixin ti Díos k'uéyahára, la tjóá ch'an. ¹⁶*Kixin ndáchro xroon itén Díos: “Jahara chrók'uejora tjóá kixin janhan la ijnko nkexro tjóá.”

¹⁷Ti ndáchrora kixin It'ára mé Díos, la chrórxaxinkáonra kixin nkokón sinchekitoexín ch'an ijié kaín chojni. Méxra jína chrókjuíkosáyehéra ch'an ti naxa tjejora ntihi chjasintajni.

¹⁸Díos mé kjuintakaára kixin chrók'uejohyara éxi kuék'ejó ti sin tsík'axrjeníxinra k'uékienxínhña sin. Jahara ó nohara jína kixin ti nkehe k'uínáxinra la jehya nkehe chóna tsjeje éxi ti oro o plata. ¹⁹Náhí. Ti ijnié Ìnchéni Jesucristo imá tjeje mé k'uínáxinra. Jehe ch'an mé ik'uén ch'an la k'uáyéhe Díos ti jehe ch'an éxi ijnko kolélo ninkehó ijie chóntahya. ²⁰Díos xráxín tsíkjejá Cristo ti naxa k'ónahña chjasintajni, kjánchó chr'éxin ndá kónoxín ch'an kixin jína chrók'uejoxinra. ²¹Cristo mé k'uényákahanra ndá xikaha kuitekáonra Díos, ti nkexro kjuínchexechón Cristo la ko kjuíkosáyehé ch'an. Mé xikaha jahara tinkachónkira Díos la ko tjejochohénra sintakaára ch'an. ²²Andá ijie ó kuitekáonra ti itan chaxín ndoá, la tíha mé kótjuáxinra kixin jína tsotjuehéra kichuara. Méxra

antsí chrótjuhéra kichuara kaín asánra. ²³Méxra ijie la jahara kokjíhi nixiénra. Jehya éxi ti k'uaxrjeníxinra it'ára ntihi chjasintajni. La náhi. Kókjíaxínra ti itén Díos itjen nkochríxín.

²⁴*Kixin xroon itén Díos ndáchro:

Kaín chojni la éxi ti kayoa, ti kjuachaxin chóna sin la éxi ti itsjo t'óna ti kayoa.

Ti ika la tsoxámá andá ti itsjo la ts'ánótjen,

²⁵ kjánchó ti itén Ìnchéni la tsjak'e nkochríxín.

Ti itan í, mé ti itan tsaáxini tjejetihínra ijie.

2 ¹Méxra tìtohéra kaín ti nkehe jínahña, la ko kaín kjuach'ia, la ko ti nkehe nduáhya tjénkayáxinra, ti kjuachjinoxíhin, la ko ti ch'énara kjuach'ia. ²Chrok'uejora éxi ijnko ixjan nantá tsíkokjíhi, tjinkaon chrók'ui itsjen ó, mé xíkaha chrókóxakohanra chrókuihínra ti itén Díos, la tíha chrók'uánkíxin ti kjuaxrexinkaon kuéntára la chrókuaára, ³*ti chaxín kjuankíxin k'uitjára kixin Ìnchéni la jína.

Cristo mé ti ixro tjechón

⁴Méxra chrókóchjinehéra Ìnchéni, kixin jehe ch'an mé ti ixro tjechón. Ti chojni la kóxríenhña sin ti ixro a; andá

Díos la kjueyá ti ixro kixin imá tjeje sínkí. ⁵Mé xíkaha Díos kjuíuch'éna ti jahara éxi ixro tjechón, mé ts'ónara ijnko nínko kuénté ch'an. La jahara ti nchat'á tsíkjinchetjóá Díos kjuachaxien Ìnchéni Jesucristo, chróchjehéra ch'an kjuasáya kaín asánra, kixin xíkaha tóxríhin ch'an. ⁶*Méxra ti xroon itén Díos ndáchro:

Janhan tsjaké ti chjasin

Jerusalén ijnko ixro kjuéyá janhan imá tjejoan, la ko tjeje sínkí,

la ti nkekro tsitekaon mé tsoseuhya.

⁷*Andá ti jahara titekáonra Ìnchéni, la jehe ch'an mé ti ixro imá tjeje sínkí. Andá ti sin kuítেকakohña, la ó xiteyá éxi ndáchro ti xroon itén Díos:

Ti ixro kóxríenhña ti sin ch'éna tjat'ó,

mé k'óna ti ixro imá tjejoan.

⁸*La kjaxin xiteyá ti nkehe ndáchro xroon itén Díos:

Ti ixro mé tsóténkíxin chojni la ko ti ixro ts'itsínkaxín sin.

Jehe sin tótenkíxin sin ti ixro a kixin titekakohña sin ti itén Díos, kixin tsíkíxién sin tsjasóte sin.

Ti sin tinkáchónki Díos

⁹*Andá jahara la Díos kjuéyá ti jahara la k'ónara

1:24: Is. 40:6-8. 2:3: Sal. 34:8. 2:6: Is. 28:16. 2:7: Sal. 118:22. 2:8: Is. 8:14, 15. 2:9 a: Ex. 19:5, 6; Is. 43:20; b: Ex. 19:5; Dt. 4:20; 7:6; 14:2; Tit. 2:14; c: Is. 43:21; d: Is. 9:2.

nchat'á sich'ehé ixra ti Rey, la k'ónara ijnko chjasin tjóá la ko chojni kuènté Díos kixin tsochroñkaxínra ti ixra náxrjón kjuích'e ch'an. Díos kjueyá ti jahara kixin ts'axrjéxínra ti sítie, ndá ts'ixehénra ti t'inkaséña náxrjón. ¹⁰ *Ti ósé la jahara naxa jehya ijnko chjasin, andá ijie la ó k'ónara ti chjasin kuènté Díos. Ósé la ninkexró k'uékiñonóehña ti jahara, andá ijie Díos tikonoehe ch'an ti jahara.

**Chrok'uejó éxi chojni
ch'eheni ixra Díos**

¹¹ Méxra jahara, kíchóni, xrjanoáhara kixin chrók'uejora éxi chojni tsíkijixín ijnko chjasin. Chrokjuájonhñara kjuachaxin chrócoxríhanra ti nkehe síin chjasintajni kixin tíha mé ti nkehe tjajonko asánra. ¹² Jína chrókjuákoxinra ti síin ti sin chónhña Díos. Ndá jehe sin, kjónté t'ándaxíhanra sin éxi chojni jínahña chóna ijie, la ts'ikon sin kixin jína ti ixra ich'era, ndá tsochjéhe sin Díos kjuasáya ti ó tsjixraká ti ñao tsjanchia ch'an nkehe ixra kjuích'e kaín chojni chjasintajni.

¹³ Jahara tinkachónkira Díos, chrókjuínchexiteyéhéra kaín ti sin t'etoan nkojnko chjasin, la ko ti ch'in t'etoan ti nación, ¹⁴ la ko ti gobierno, kixin Díos mé kjueyá ti jehe sin kixin sinchekjasóte sin ti chojni tjasin

ijie la ko tsjikosáyehe sin ti nkexro nchexiteyá ti nkehe jína. ¹⁵ Kixin Díos tjinkaon kixin jína chrókjuákoxinra, ndá xíkaha ti chojni noehña la ko ti sin lonñi mé tsoatán sin.

¹⁶ Chrok'uejora éxi chojni chóna kjuachaxin, kjánchó ti kjuachaxin chontara la jehya kixin chrókjuásixínra ijie. Náhí. Icha jína chrókjuákoxinra kixin ch'ehéra ixra Díos.

¹⁷ Chrochontehéra kjuasáya kaín chojni. La chrótjuehéra ti sin kíchóni, la ko chróchontehéra Díos kjuasáya, la ko chrókjuíkosáyehéra ti chojni t'etoan.

**Chrokuitekaon ti sin
ch'exón ixra**

¹⁸ Jahara chojni ch'exón ixra, chrókuitekákohénra ti lamoara la ko chróchontehéra sin kjuasáya, kjónté á chojni jína la o chojni jiehe. ¹⁹ Tíha mé ijnko nkehe jína chrókjuákoxinra, kjónté nduáhya chrókjuasótiaxínra, kixin xíkaha tjákoxinra kixin chaxín nchexiteyéhéra Díos.

²⁰ Andá jahara, ti ichrén nkehe jínahña tjejoch'era, ndá sinchekjasóte sin ti jahara la, çá nkehe chrókjuachara kjónté chrókónínkákonhñara? Andá ti chrókjuasótiaxínra ti nkehe jína tjejoch'era, la chrókjuachara chrókónínkákonhñara, la tíha mé toxríhñi Díos. ²¹ Mé xíkaha

k'uéyahára Díos kixin Cristo kjuasótexín ti ijjára. Tíha mé kjuakoxin ch'an kixin xikaha jína chrókjuakoxinra. ²²*Cristo la ninkehó ijie kjuasinhña ch'an la ko kjuích'iyehya ch'an ninkexró. ²³*Ti ó k'uándaxihin sin ch'an la ninkehó kjuátehya ch'an; ti ó kjuínchekjasóte sin ch'an la kjuanchahya ch'an kixin chrókjuasóte sin. Náhí. Jehe ch'an ó nohe ch'an kixin Díos mé ndoá sinchekitoxén ijie ti sin a. ²⁴*Cristo mé kuamá ti ijieni kixin ti cuerpoé ch'an kjuák'enkáni ntacruz kixin í tsochóntahyani ijie, andá ijie la chrók'uejóni nkojína kixin Cristo kjuasótexín ti ijieni, chrít'o ntøe ch'an kixin chrókuiteoxíni jína. ²⁵Ósé la jahara kuék'ájira éxi kolélo tsíkijichrøe. Andá ijie la ó ikjanra tinkachónkira Cristo, ti nkexro ts'ayakohen ti asánra.

Nkexrín chrók'uejó ti sin tsíkótehe

3 ¹*Jahara chojnichjin ó tsíkótehe, chrókuitekákohénra ti xíara kixin ti nkojín sin naxa titekakönhña sin Díos la chrókuitekaon sin kixin jína tjákoxinra la ticháxinhña tsochenkara nkexrín chrókuitekaon sin, ²kixin ó ts'ikon sin kixin jína tjejora la ko chontehera sin kjuasàya. ³*Máhña chrókóxakohanra ti

nkehe náxrjón tjásimá asánra la chrókjuinchenkexinra la ko jehya ihnke chrókjuendoára ti ikjára chróchónta nkehe náxrjón la ko ti nkehe tsík'ónaxín oro ko iká imá tjeje. ⁴Náhí. Chrokjuinchejína asánra, kixin ti nkehe chaxín náxrjón ts'itjáñahña mé ti asén chojni tónínkakönhña. Tíha mé imá sínkí nkayakon Díos. ⁵Ti ósé mé xikaha k'uékjich'e ti chojnichjin jína. Jehe sin mé kuinkáchónki sin Díos la ko kjuínchexiteyéhe sin ti xii sin. ⁶*Mé xikaha kjuích'e ti tjan Sara, kjuínchexiteyéhe tjan ch'in Abraham, la ndáchro tjan kixin ìnché tjan ti ch'in Abraham. Andá jahara chojnichjin, ti tjenkayáxinra ti nkehe jína la ko ninkehó kjuachrakon chróchontahyara mé ts'ónara éxi xjeen ti tjan Sara. ⁷*Kjaxín jahara chojnindoa tsíkótehe, xráxinkaonra ti ichjiánra la chontehera tjan kjuasàya, chrókjuínkítsara tjan kixin kanhño fuerte tjan la ó nohara kixin Díos mé tsjajon ti kjuachón nkochríxín. Ti xikaha chrókuitekáonra la kohya nkehe ts'inkákohen ti ó tsonixjehéra Díos.

Ti sin tjasótexín ti ixra jína kjuích'e sin

⁸Méxra, nkokøa chrók'uejora chrókjuénkayáxinra jína, la

chrókuikonoéhéra kichuara la ko chrótjuehéra sin. Nkojína chrónixjehéra kichuara la chrókjuinchejína asánra la ko chrókjuinchejiéhya asánra. ⁹Ti ichrén nkehe jínahña chrókjuít'ahara nkojín chojni, la xikahña chrókjuich'era jahara. Ti chrók'uándaxíhanra sin la xikahña chrók'uándaxíhínra sin. Náhí. Ícha jína chrókjuanchehéra Díos kixin chrókjuincheñaó ch'an ti jehe sin kixin Díos k'uéyehe ti jahara kixin chrók'uayéhéra ti kjuachaxin kuénté ch'an. ¹⁰*Éxi ndáchro xroon itén Díos:

Ti nkexro tjinkaon kjuaxróxin tsjak'e kaín ñao, la chjiñéhña chrónixja sin ti nkehe jínahña la ko ninkehó kjuach'ia chrók'uaxrjexinhña ti ir'ua sin.

¹¹ Ícha jína chrókuítóhéra ti nkehe jínahña, andá chrókjuéyára ti nkehe jína, la ko chrókjuéyára kixin kjuaxróxin chrók'uejokōara kaín chojni.

¹² Kixin Ìnchéni la t'ayakohen ti nkexro jína la ko tihin ch'an ti ó nixjehe sin ch'an, kjánchó ti nkexro ich'e ti nkehe jínahña, la tjinkitsahya ch'an.

¹³ ¿Xá nkexro chrókjuít'ahara nkojín nkehe jínahña, ti

tjejoch'era ti nkehe jína? ¹⁴ *Andá ti chrókjuasótexínra ti nkehe jína tjejoch'era, la chrókócháhara, chróchrakuēnhñara ninkexró la ko chrókóxakuanhñara.

¹⁵ Ícha jína chrókjuikósáyehéra Cristo nkaya asánra kixin jehe ch'an mé Ìnchéni. Chrok'uejora listo chrókjuátéhéra ti nkehe chrókjuanchankíhara nkojín chojni nkexrín ti tinkachónkira Ìnchéni, kjánchó chrókjuinchenkehyara la chrókjuátéhéra jína ti ichrén nkehe chrókjuanchankí sin.

¹⁶ Chrokjuákoxinra jína kixin chrók'uikon ti sin xrich'ia t'ándaxíhanra kixin jína tjejora tinkachónkira Cristo, ndá chrókósuehé sin. ¹⁷Ícha jína chrókjuasótiaxínra ti nkehe jína tjejoch'era ti xikaha tjinkaon Díos, ke ti nkojín nkehe jínahña chrókjuasótiaxínra.

¹⁸ Kixin Cristo la kjuasótexín ch'an la ik'uén ch'an kixin ti ijie kuénténi, ó nkokoaxón ik'uén ch'an. Jehe ch'an la imá jína ch'an, kjánchó kjuasóteyákohen ch'an ti jeheni kjónté jínahñani, ndá xikaha jína sátsjikoni ch'an ti itjen Díos. Ik'uén ti cuerpoé ch'an, andá Nchakuén Díos mé kjuínchexechón ti jehe ch'an ínaá, ¹⁹ndá xikaha sákjuikjakōhe ch'an ti nchakuén ti sin tsík'en tjejóchjina. ²⁰*Ti sin a mé kuítekakonhña sin ti ósé, ti kjuák'e Noé. La Díos

kjuák'echóhen ch'an ti naxa k'ónahña ti arca, mé ijníkoá chojni kuitekaon sin la ko kuaá sin ti ó kuíte sin inta. ²¹Ti inta mé yóhe éxi ti tikiteni ijie kixin xikaha tsaáni. Andá ti tikite chojni la jehya kixin tíha tsotjuáxin ti cuerpo chóna sin. Náhí. Tsjancheheni Díos kixin sinchetjóá ch'an ti tjenkayáxini ndá tsaáni kixin Inchéni Jesucristo la xechón ch'an, ²²la ko sákjuí ch'an nkaya nkajíní la itjen ch'an ti itja chjina kuènté Díos. Jehé ch'an mé t'etuehen ch'an ti sin ángel la ko kaín ti sin t'etóan tjejó nkaya nkajíní chóna kjuachaxin.

**Chrokjuich'ehe ni ixra
Díos éxi tjinkaon ch'an**

4 ¹Méxra éxi Cristo kjuasóte ti cuerpo kuènté ch'an, la xikaha kjaxinra, kjónté chrókjuasótiara la chrókóxakuanhñara kixin ti nkexro tjasóte ti cuerpoé la ó kuítóhe ti ijie. ²Méxra ti naxa tjejotsjehéra ntihi la chrók'uejora éxi tóxríhin Díos, jehya éxi ti nkehe tóxríhanra. ³Itsje nánó kuék'ejora éxi ti sin naxa chónhña Díos, la k'uékjenkayáxinra ti nkehe jínahña, k'uékjásinra ijie, k'uéchontara ókjé chojnichjin, k'uékjásinra kia la k'uékokoanra, la ko k'uékjájónra la ko k'uékinkachónkíra ti nkehe

tsíkjanóña. ⁴Andá ijie la ti sin kuék'itonra la chrakon sin kixin í ch'ehyara ti nkehe jínahña. Méxra imá t'ándaxíhanra sin. ⁵Kjánchó jehé sin tichánxin tsochronka sin ti ijie chóna sin ti ó tsochjina sin nkayakon ti nkexro sinchekitoéxin ijie kuènté ti chojni tjejóchón la ko chojni tsík'en. ⁶Méxra, kjaxin ti sin ó ik'uén la kuíhin sin ti itan nixin kixin chrókuitekaon sin chrók'uejó sin éxi tjinkaon Díos, la kjónté ti naxa k'uejó sin chjasintajni la kuitóéxin ti ijie sin, kjuasóte sin la ko ik'uén sin éxi tóhen kaín chojni, kjánchó ts'ejóko sin Díos.

⁷Ó kuichjina ti tsjeje chjasintajni, méxra nkojína chrók'uejora la ko chrók'uejotsjehera, chrónixjehéra Díos. ⁸*La ti nkehe antsí tjeoan la chaxín chrótjuehéra kichuara, kixin tíha mé ts'itjáñaxín kaín ti ijie chontehera kichuara. ⁹Chrokjuájónra kjuachaxin chrókuítóhe ti sin tinkáchónki Díos ti ndóara la ninkehó chrókjóntahyara sin. ¹⁰Nkojnora chrókjuákoxinra ti kjuachaxin tjáhara Díos la chrókjuínkítsara kichuara éxi ti ixra k'uayéhéra. ¹¹Ti nkojinra tsonixjara itén Díos la chaxín chrónixjara éxi tjenixín ti Xroon itén Díos. Andá ti nkojinra tsjínkítsara kichuara la chaxín chrókjuákoxinra ti kjuachaxin tjáhara Díos.

Kaín ti ixra chrókjuich'era, la chróchjehéra Díos kjuasáya kixin tinkachónkira Jesucristo, ti nkexro ts'áyéhe kaín kjuasàya la ko chóna ti kjuachaxin nkochrín. Mé xikaha tsohen.

**Tsjasótexini ti
tinkáchónkini Cristo**

¹²Kíchóni, chrókóxakuanhñara kjónté ijnko kjuaxikaon ijie chrókjuasótiaxínra kixin ticháxin xikaha tsohanra. ¹³Ícha jína chrókócháhara kjónté tsjasótiaara kixin xikaha kjuasótexín Cristo ti ijieni. Ndá xikaha imá tsocháhara ti ó ts'ikonra ti kjuachaxin ijie tsikao Ìnchéni ti ó tsokjan ch'an. ¹⁴Chrókócháhara kjónté t'ándaxíhanra chojni kixin tinkachónkira Cristo kixin ti kjuachaxin kuenté Nchakuén Díos la t'ayakohanra. Jehé sin la t'ándaxíhín sin Ìnchéni, andá jahara antsí chrókjuíkosáyahéra ch'an.

¹⁵Ti nkojinra tjeotjasótiaara la jehya chrókjuasótiaxínra kixin kjuàya, kueéra o ichrén nkehe jínahña kjuich'era o kjiatéra nkojin kjuanínkaon kuenté ókjé chojni. ¹⁶Ti nkojinra chrókjuasótiaara kixin tinkachónkira Cristo la chrókósuàhyara. Ícha jína chróchjehéra kjuasáya Díos kixin tinkachónkira ihnié ch'an.

¹⁷Ndá ijie ó ikui ti tsitoxén ijieni la tíha tsoxrankíxixín ti

sin k'óna xjeen Díos. Andá ti tsoxrankíxixín tsitoxén ti ijieni la ti sin titekakonhña Díos la, ¿xá nkexrín ts'atsínka sin? ¹⁸*Andá ti sin jína tsitoxén ijie sin kixin á jína ti xra kjuich'e sin ndá tsaá sin, la ti sin jínahña chóna ijie la, ¿xá nkexrín ts'atsínka sin? ¹⁹Andá ti nkexro tjasóte éxi tjinkaon Díos la chrókuítóehya sin chrókjuakoxín sin ti nkehe jína la chrókjuajon sin asén sin chrók'uayakohen Díos kixin jehé ch'an kjuich'éna ch'an ti jehé sin la nkochrín jína ch'an.

**Ts'ayakoheni ti kolélo
kuenté Díos**

5 ¹Tjínkaon tsonixjahá ti sin t'etoan ti nínko tjejora, kjaxin janhan tétóan nínko éxi jehé sin, la ikuan k'uíkonxian nkexrín kjuasóte Cristo, la ko kjaxin ts'ayáha ti kjuachaxin kuenté Díos éxi ts'áyéhe iso sin ti ó itsi Ìnchéni. ²*Chrok'uayakohénra jína ti kolélo kuenté Díos kixin tíha ti ixra k'uayéhéra. La nkojína chrókjuínkítasara sin éxi tjinkaon Díos la jehya kixin íjnko chojni chrók'uetauhanra chrókjuich'era ti ixra, la ko jehya imá chrókóxríhanra chrókjuachara chichaon. Náhí. Kaín asánra chrókjuich'era ti ixra jína. ³Chjiñéhña chrók'uétuehénra sin, t'ayakohénra sin jína kixin jehya kuentára ti jehé

sin. Méxra chrókóxakohanra chrókjuákohéra sin nkojína. ⁴Ndá xíkaha ti ó itsi ti Pastor chaxín t'etōan, ndá jahara ts'ayéhéra ijnko corona náxrjón tjechóhen nkaya nkajní, tíha mé ijnko corona tsjejehya.

⁵*Andá jahara ntasoíra chrókjuinchesteyéhéra ti sin t'etōan kuénté nínko la ko kaínra nkojína chrókjuinchesteyéhéra kichuara la chrókjuinchenkehýara kixin:

Díos la tjinkakonhña ti chojni nchehnke, andá ti sin nchenkehýa mé tsjinkĩtsa ch'an.

⁶*Méxra

chrókjuinchenkehýara, chrókjuinchentsí asánra, la chrókjuinchesteyéhéra Díos kixin jehe ch'an la chóna ch'an kjuachaxin ijié, la ti ó tsokjan ch'an la tsotjáhara ch'an kjuachaxin. ⁷Chróchenkara Díos kaín ti kjuaxikaon chontara kixin jehe ch'an la imá t'ayakohen ch'an ti jahara.

⁸Méxra chrókóxakohanra jína chrók'uejora kixin ti Jínahña, ti nkexro nínkakohanra, mé éxi ijnko koxra jjehe xíkaha xritjeyá nkexro sinie. ⁹Jína chrók'uejora, chrókuinkachónkira Ìnchéni. Tjájonhñara kjuachaxin kixin ti jínahña chrókjuacha chrók'uetuahanra, la ó nohara

kixin kuenté chjasintajni la kaín ti sin kichuara tjejótjasóte sin kixin tinkáchónki sin Ìnchéni.

¹⁰Andá ti ó tsjixin tsjasótiara, kjónté kanhño isé, la Díos sinchetjóá ti jahara la ko antsí tsjinkĩtsa ch'an kixin tsjachara ts'ejora jína. Méxra Díos la tjuahára la k'uéyahára ch'an kixin ts'ejokōara ch'an nkokōa ti itjen Ìnchéni Jesucristo chóna kaín kjuachaxin. ¹¹Méxra tsochjéheni ch'an kjuasáya kixin jehe ch'an chóna ch'an kjuachaxin ts'etōan ch'an nkochríxín. Mé xíkaha tsohen.

Kjuixixín nixja Pedro

¹²*Ch'in Silvano ijnko kichóni jína mé kjuínkĩtsa ch'an ikjian ti xroon í, kjónté kanhño itsjé nixja ti xroon, la ntáxráxinkaonra kixin kjuíntañañonra Díos la xíkaha kjuakōxin ch'an kixin chaxín tjuahára ch'an. Méxra jína chrók'uejora.

¹³*Ti nínko itjen Babilonia mé Díos kjueyá ch'an ti jehe sin éxi kjueyá ch'an ti jahara, mé nixjahára sin la ko kjaxin nixjahára ch'in Marcos, ti nkexro t'íkuan éxi xjana.

¹⁴Nixjehéra kichuara nkojína. La kjuaxróxin t'ejora kixin tinkachónkira Jesucristo. Mé xíkaha tsohen.